



REPUBLIKA E SHQIPËRISË  
**AUTORITETI I KONKURENCËS  
KOMISIONI I KONKURENCËS**

**VENDIM**

**Nr. 575, Datë 03.12.2018**

**“Për hapjen e procedurës së hetimit paraprak ndaj ndërmarrjes “Bankers Petroleum Albania” LTD në tregun e prodhimit dhe tregtimit të naftës bruto”**

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 03.12.2019, shqyrtoi çështjen me:

**Objekti:** Hapja e procedurës së hetimit paraprak ndaj ndërmarrjes Bankers Petroleum Albania LTD (Bankers) në tregun e prodhimit dhe tregtimit të naftës bruto.

**Baza Ligjore:** Neni 8, neni 9, Neni 24, shkronja (d) dhe neni 42 i Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar (Ligji Nr. 9121/2003).

**Komisioni i Konkurrencës,** pas shqyrtimit të relacionit të Sekretarit të Përgjithshëm mbi ankesat ndaj ndërmarrjes Bankers,

**VËREN SE :**

1. Pranë Autoritetit të Konkurrencës ndërmarrja “Tosk Energji” SHA (Tosk) dhe “Al.Global Oil” SHA nëpërmjet Formularit të Ankesës kanë depozituar ankesën ndaj ndërmarrjes Bankers, lidhur me abuzimin me pozitën dominuese në tregun e prodhimit dhe tregtimit të naftës bruto, duke kërkuar dhe marrjen e masës së përkohshme ndaj ndërmarrjes Bankers.
2. Gjatë vitit 2017, sasia totale e naftës bruto e prodhuar në Shqipëri është 860,240 ton, nga të cilat ndërmarrja Bankers është prodhuesi më i madh në krahasim me prodhuesit e tjerë me 835,820 ton.
3. Sipas sasisë totale të prodhuar në Shqipëri të naftës bruto, për vitin 2017 ndërmarrja Bankers zë rreth 97.2% të tregut përkatës dhe për tre mujorin e parë të vitit 2018 zë

- 96.8% të tregut.
4. Një nga kriteret bazë për vlerësimin e strukturës së tregut është pjesa e tregut të ndërmarrjeve në tregun përkatës. Duke marrë parasysh pjesët e tregut përkatës të ndërmarrjeve, bazuar në nenin 8 të Ligjit Nr. 9121/2003, ndërmarrja Bankers ka pozitë dominuese në tregun e prodhimit dhe tregtimit të naftës bruto në Republikën e Shqipërisë.
  5. Për ndërmarrjet që ushtrojnë aktivitetet në tregun e përpunimit të naftës bruto dhe prodhimit të nënprodukteve të naftës, furnizimi me këtë produkt është i domosdoshëm për vazhdimin e aktivitetit të tyre, pasi mungesa e furnizimit sjell ndërprerjen e procesit teknologjik.
  6. Referuar ankesave, rezulton se ndërmarrja Tosk ka marrë me nën qira Rafinerinë e Përpunimit të Naftës në Ballsh, kurse ndërmarrja “Al.Global Oil” SHA zotëron Uzinën e Përpunimit të Naftës në Fier.
  7. Ndërmarrja Bankers ka lidhur me ndërmarrjen Tosk kontratën e shitjes së naftës bruto datë 01.05.2018 për furnizime për periudhën Maj- Dhjetor 2018 dhe me ndërmarrjen “Al.Global Oil” SHA kontratën e shitjes së naftës bruto datë 01.04.2018 për furnizime për periudhën Prill - Dhjetor 2018.
  8. Nga provat e depozituara nga ndërmarrja “Al.Global Oil” SHA, referuar komunikimit nëpërmjet e-mail, rezulton se ndërmarrja Bankers i ka ofruar kësaj ndërmarrjeje që për periudhën Janar – Dhjetor 2019 ta furnizojë me 4,000 Mt naftë bruto +/- 10% në muaj.
  9. Sipas ndërmarrjes “Al.Global Oil” SHA, kapaciteti maksimal përpunues mujor i saj është 30,000 Mt/muaj ndërkohë që ndërmarrja Bankers e furnizon me vetëm 48,000 Mt/vit.
  10. Sipas ndërmarrjes Tosk, ajo është furnizuar me 81,991.30 MT naftë bruto, kurse nevojat e saj për furnizim janë 375,000 MT. Sipas ndërmarrjes Tosk, kjo mënyrë jolineare furnizimi dhe jo në sasinë e duhur ka sjellë fikjen 2 here të rafinerisë në një kohë shumë të shkurtër ku shkaku kryesor i fikjes ka qenë mosfurnizimi me lëndë të parë, naftë bruto.
  11. Mos furnizimi i ndërmarrjeve që ushtrojnë aktivitetet në tregun e përpunimit të naftës bruto dhe tregtimit të nënprodukteve të naftës, nga ndërmarrja me pozitë dominuese Bankers në tregun e prodhimit dhe tregtimit të naftës bruto, me sasinë e nevojshme të naftës, sjell kufizimin e prodhimit të nënprodukteve të naftës nga këto ndërmarrje dhe për rrjedhojë mund të kufizojë konkurrencën në kuptim të nenit 9, pika 2, gërma (b) të Ligjit Nr. 9121/2003.

#### **PËR KËTO ARSYE:**

Komisioni i Konkurrencës, bazuar në nenin 8, nenin 9, nenin 24, shkronja (d) dhe nenin 42 të Ligjit Nr. 9121, datë 28.07.2003 “Për Mbrojtjen e Konkurrencës”, i

ndryshuar,

**VENDOSI:**

- I. Hapjen e procedurës së hetimit paraprak ndaj ndërmarrjes Bankers Petroleum Albania LTD (Bankers) në tregun e prodhimit dhe tregimit të naftës bruto;
- II. Hetimi paraprak të përfshijë periudhën kohore nga 1 janar 2016 deri në 30 nëntor 2018.
- III. Raporti i hetimit paraprak duhet të paraqitet në Komisionin e Konkurrencës jo më vonë se 3 (tre) muaj nga dita e çeljes së këtij hetimi.
- IV. Ngarkohet Sekretari i Përgjithshëm për zbatimin e këtij vendimi dhe njoftimin e palëve të interesuara.

Ky vendim hyn në fuqi menjëherë.

**KOMISIONI I KONKURRENCËS**